

Sunday, March 1, 2026

Time - 2:30pm - 2:35pm

**AKASHVANI AIZAWL
REGIONAL NEWS UNIT**

**REGIONAL NEWS BULLETIN
(MIDDAY)**



KTP GEN. CONFERENCE

Mizorama Thalai Inkhawmpui lian ber Kristian Thalai Pawl (KTP) General Conference vawi 61-na, Saitual Public Playground, a nghah chu Ningani atang khan tan a ni a, zanin hian a tiak ang.

General Conference thupui hi ‘Pathian tana mi hlang’ (sam 119:1-3) niin Speaker chu Rev. P.C. Lalropuia a ni. Inkhawmpui tan zan kha Palai lawmna hun atana hmangin Synod Secretary Rev. B. Zohmangaiha'n KTP kumpuan thupui ‘Chhungril takna (Sam 51:6)’ tih chu Pathian hnenah hlanin a tlangzarh a, Rev. John Raldosanga, Synod Moderator hnen atangin Pathian thuchah ngaihthlak a ni. Zirtawpni chawhmaah Rawngbawlna Report inkhawm neih a ni a, chawhnuah Variety Programme-in hun hman a ni a, zan Pathian biak inkhawmah Executive Secretary i/c KTP Rev. Dr. Rosiamliana Tochwawng-in Pathian thuchah a sawi a. Nimin chawhma khan Saitual Kohhran Biak Inah Rorel Inkhawm a awm a, rorel hlan hian Pandal-ah Variety Programme a awm a, zan inkhawmah Speaker hnen atangin Pathian thuchah ngaihthlak a ni a, Zan inkhawm banah concert neih chhunzawm a ni.

Vawiin chawhma leh chawhnu inkhawmah Speaker hnen atangin Pathian thuchah ngaihthlak leh a ni a, zanah Central KTP Leader kal chhuak tur, Rev. H, Lalawmpuia'n Pathian thuchah a sawi ang a, kum 2026 - 2028 chhunga CKTP hruaitu thar hlanna neih a ni bawk ang. Zan inkhawm banah Fakna Inkhawm neih chhunzawmin inkhawmpui hi a tiak dawn a ni.

Nikuma KTP inchhiarna a a lan dan chuan bial KTP 218, branch 917 awmin branch 865 chu Mizoram chhung ami a ni a, branch 52 chu Mizoram pawn ami a ni . KTP member hi nuai 1, sing 8, sang 1 leh 131 an awm a, an zinga nuai 1, sang 9 leh 456 chu mipa an ni a, hmeichhia ,71,675 an awm bawk. Nikum chhung khan KTP member 569 an thi a, an zinga 502 chu mipa niin hmeichhe thi zat hi 67 an ni a, member thi awm lohna bial 50 a awm ani. Nikum chhung vek khan KTP member

nupui/pasal nei 3,435 an awm a, an zinga 1,610 (za zela 46 point 87) chu biakina innei an ni a, hmun danga innei 1,825 (za zela 53 point 13) an awm bawk a ni. KTP branch member ngah ber chu Aizawl Mission Veng branch niin member 1,447 an awm a, member nei tlem ber chu Peren KTP branch (Kohima Bial) a ni a, member 3 chauh an awm ani.

Saituala KTP General Conference hman mekah hian Reception duty te chhinchhiahna hnuhnung berah vawiin chawhma thleng khan palai 47,039 an chhinchhiah tawh ani.

KTP General Conference-ah hian vawiin chawhma inkhawmah khan mi 59,000 bawr vel inkhawma ngaih a nih thu KṚP General Secretary thupuanah tarlan a ni a. Reception lam hotute chuan hmun dang atanga Saitual inkhawmpui palai lut zat hi mi sing 5 chuang fe an nih an rin tawh thu an sawi a. An chhinchhiahnaa mi 47,000 chuang hret chu portal system-a chhinchhiah vek a nih avangin dik tura ngaih a nih thu an sawi a. Hetihruah hian palai in report lo an thahnem hle tih an sawi a ni.

Nimin nileng khan Saitual Kohhran Biak Inah CKTP Leader Rev H. Lalawmpuia hovin ro rel ani a, Thurel zingah Synod Charity Fund atan ṭum khat inkhawm thawhlawm lakkhawm te, Youth Recreation Centre puala ṭum khat inkhawm thawhlawm lakkhawm te, Central KTP in ruihhlo do kawngah chak zawka hma lakte, Street Ministry neih leh rawtna te, General Conference thlengtu puihna Bial tina Special budget siam rawtna te pawm a ni a. Kum 2030 KṚP Gen Conference chu Zawlnuam leh Bawrai Pastor Bial ten an inthlen ṭawm dawn a, a hun atan February ni 28 atanga March ni 3, 2030 ruat ani.

Vawiin Pathianni hian CM Pu Lalduhoma bakah bialtu MLA Prof. Lalnilawma, Dr. Vanlalhlana leh Pu Lalnghinglova Hmar ten Conference hi an chhim a ni.

(Desk/Corr: Dr. Ruata/PTC, Saitual)



PRISON

Mizorama Jail 11-ah mitang 1,496 dah theih a nih lai-in tang 1,720 an awm mek.

Tun hnai a Assembly zawhna a chhanna-ah Home Minister Pu K. Sapdanga chuan Aizawla Central Jail leh Central Women Jail bakah District Jail 9-ah te mitang 1,496 awm thei tura duan a nih laiin kumin February ni 5 khan mi 1,720 an tang mek niin a sawi a. Tang dah theih zat aia tamna hi mi 224 an ni. Aizawl Central Jail a mi 480 dah theihna-ah tang 859 an awm a, Central Women Jail chu mitang 96 awm theihna a nih laiin tang 122 an awm a. Aizawl district Jail-ah pawh mitang 90 awm thei tura ruahman a nih laiin mi 131 an tang a ni. Champhai District Jail chu tang 105 awm theihna tura duan a nih laiin 165 an tang a. District Jail panga-ah tang awm thei zat tur aia tlem an tang mek a, tang 68 awm theihna tura duan Saitual District Jail-ah chuan February ni 5 khan tang an awm lo a ni.



FREE CLINIC

Lairam Isua Krista Baptist Kohhran in a din, Lawngtlai a Lairam Christian Medical Centre kum 25 tlin lawmna atan Medical Board in a rel angin Bungtlang South-ah nimiran mipui a mamawh apiangte tan, a thlawna inentirna Free clinic buatsaih ni.

Free Clinic ah hian Doctor pathum leh thawktu dang mi 10 kalin an zingah hian ha lam Doctor pawh a tel a, damdawi lam thiamte pantute hi thisen endikna a thlawna vek a tihsak an ni a, Damdawi thahnem tak a thlawna sem a ni bawk. Bungtlang South a Free Clinic-ah hian damlo mi 400 chuang en an ni. Lairam Christian Medical Centre, Lawngtlai in kum 25 a tlin lawmna atan Bualpui Ng-ah leh Sangau- ah te free clinic hi neih chhonzawm turin ruahmanna siam a ni.

Lairam Christian Medical Centre, Lawngtlai hi September 19, 2001 khan hawn a ni a, kum thum chhung chu damdawi zawrhna chauh a kalpui niin, kum 2004 November atang khan thisen examna te buatsaih in, khum 10 a bultanin Hospital anga kalpui tan a ni.

(Lalnggheta Ralte, PTC Lawngtlai)

